

Hakkiwa Adamganabe Dunya Ngaro Wowurtəgənama

Katiwu Kura

Adamgana woso kalkal ye kamanzəga nəmngalwo hakkiwa-a nambe-a kənzambibelan kozənyi ye.

Lardəwa Tawakkata Dunyabedə hakkiwa adamganabe ndubesoga haptaa-a nzətkawo-a nzəliwo-asoro tarai cizə dazəna. Tarai cizə datənzə adə Tawakam Lardəwa Tawakkata Dunyabebe duwo nəmkam ummawa dunyabebe suro hakkiwa adamganabe-a kuru suro daraja-a nəmngalwo-a ummabe yitatawatsəgənadəben culuwo.

Suro Hakkiwa Adamganabe Dunya Ngaro Wowurtəgənadəben Lardəwa Tawakkata Dunyabedəye futu kəskelan asutinro hakkiwa duwo kam wosoro kalkalro kartaa adəga bayangono.

Hakkiwa anyi nyiro kartaa.

Sandi anyi hakkiwanəm

Sandiga tigənəmro fatkəgəne. Banane sandiga hapkəgəne ye liwe ye kəlanəm-a ummawa amanəm gade gapsəna-asoro.

Yitagattəgə

Adəgaima tada adamganabebe nəmngalwonzə kambaata adə-a nəmnduasə kalkalnzə-a hakkiwanzə Alanjo-adə shima ferno nəmkambe-a jirebe-a nələfabe-aro dunya ngason asutəna,

Adəgaima hakkiwa adamganabero cistəgə ba-a fallaktə-abe sawowuro kəndowa halye kurzənyi waazə hangal adamganabero karega rozəgəna, kuru dunya duwo suron adamganasoye tamtam hakkinza manabe-a nzasarabe-a kuru nambe duwo dalil baaro citə-a jero-abadə shima awo talaawaye təmazana woro warmowotə,

Adəgaima awo mərədətənadə susu adamganaga dunon təkəkə nəmzaləm-a njokuno-a kəriwutəbedəro howum maibeye hakkiwanzaga səliwodəma,

Adəgaima awo mərədətənadə tawaa-a nəmkam-a indikate lardəwaben haptaadəma,

Adəgaima ummawa Lardəwa Tawakkata Dunyabeye suro Tawakamdəben kamburshenza kəla hakkiwa adamganaben nanazaana, kəla daraja-a nəmngalwo-a adamganabe-a kəla kamu-a kwa-a hakkinza kalkal-aben kasadə gozana tamtam-a kəndəga ngəla-a hapsaa nambe gayaga fandoro,

Adəgaima Lardəwa Memba Kaapkadəbe woso wadəga gozana, tawaa Lardəwa Tawakkata Dunybemben, daaraja ndubeso haptaa-a hakkiwa adamganabe-a nambe gaya lajiptə-a galtəro,

Adəgaima wadə adəga yitagatəgə nankaro hakkiwa-a nambe anyi-a asutadə awoye gaya linta,

Adə Nankaro

Samno Kura Dunyabedəye

Hakkiwa Adamganabe

Dunya Ngaro Wowurtəgəna Adəga

warmazəgə

shima mizan ummawa-a lardəwa-a duksoye yitagattəgəbe wo, daji daryenzədə ndu-a nduana-asə fellawan kunten, Wowur adəga karəgən roza, ndusoro yikkəlio-a ilmutəgə-an hakkiwa-a nambe anyi-abe nəmgyanza haptaa-ro, suro lardəbe-a indikate lardəwabe-ason ndusoye kalkalro asuzə lajipsə, suro ummawa Lardəwa Memba Karapkadəbe-a suro ummawa gade sədiyanzalan dawuna-ason.

Babu 1

Adamgana woso kambe katambo ye daraja-a hakkiwa-ason kalkalye. Hankal-a nazaru-asoro kəzəpkə ye suro hal nəmhamiben kamazasoga letaiyin ye.

Babu 2

Hakkiwa-a nambe a suro Wowur adəben dəganadə ndu-a nduana-asə kartaa, gayirtə futubibema baaro, gayirtə alama jilibeso, kadigəbeso, alagəbeso, təlambeso, adinbeso, siyasabeso au rayiwu, lardə gade au kaduwu gade, kənganti, tambo au awowa laa gade anyiga samunzəna.

Anyibe ngawoman nduma kəla siyasaben kal, kəntəwoben kal au daraja dunyalabe sawawuro kal kərye au lardə kamdə dəganabe sawawuro gayirtinba. Lardə shi gultanama adə kərmai kəlanzəben karga, amanaro musko lardə gadəben karga, kəlanzəlangənyi karga au sədiya kaidawa kəntəwobe laan karga yaye kal.

Babu 3

Ndu yaye hakkinzə kəla ronza-a nəmkambenza-a nələfa kəlanza-aben mbeji.

Babu 4

Nduma kənji au kaliyaro təgandinba, nəmkenjiro gərtə-a kənji lado-asə awostə ye daptə ye.

Babu 5

Nduma njokunoso, nəmkeladoso, shimaso, azawaso, gənatəginba.

Babu 6

Ndu yaye hakkinzə ndaran yaye shiga kamro asutabe mbeji fuwu howumbelan.

Babu 7

Nduso fuwu howumben kalkal ye kuru gayirtə baaro howumye sandiga səliwin ye. Nduso hakkinzə nzəliwobe mbeji gayirtalan fallaktə Wowur adəbe sawawuro-a kəla lan laa gade gayirtadə nankaro waazəna-alan.

Babu 8

Ndu yaye hakkinzə səlwu sandəna mataabe mbeji shara rakkata lardəbelan kəla hakkinzə gaya linta dusturye au howumye shiro cina namtənen.

Babu 9

Nduma dalil baaro kəntaso, jeroso, lardən dutaso ba.

Babu 10

Ndu yaye hakkinzə futu mərədəzənaro shiga shara naptə kəlanzəbe walama baa ye jireə yebe kərəntabe mbeji kəla hakkinzə-a kaidawanzə-a kuru awowa gade shara zəgənyi-a tawattaaben.

Babu 11

Ndu yaye ngawo ayawu sədənen angərdə hakkinzə kawu shiro fuwu sharaben ngawo səliwo mərədətəna shiro sadənen ayawunzəga tawatsaginro.

Nduma kəla awo abima gənyiben ayawuro tətəinba futubin waano yaye ayawudə ayawuro walzənyiga, sədiya howum lardəben au indikate lardəwaben, sa ayawu adə tədənaladən. Biya gənatəginro walwono yaye ayawu sadən tədənadəga kozəna gənatəginba.

Babu 12

Ndu kɛla baaro wujirwa kɛlanzɛbema, yalwanzɛbema, au lamar lenɛm-arenzɛbemaro ci tɛkinba, biya kɛla nɛmkamnzɛ-a darajanzɛ-abe nankaro fitɛnatinba. Ndu yaye hakkinzɛ howumye shiga nzɛlifobe mbeji kɛla dalil baaro wujirwanzɛro ci nzɛkko-a fitɛnatɛ-aben.

Babu 13

Ndu yaye hakkinzɛ famno-a fato gar-abe mbeji suro dɛrinɛmkɛlle lardɛ ndasoben yaye.

Ndu yaye hakkinzɛ lardɛbi yaye luwum koltɛbe mbeji, lardɛ kaanzɛn kunten, kuru lardɛnzɛro waltaabe ye mbeji.

Babu 14

Ndu yaye hakkinzɛ lardɛwa gaden nafaka nzɛliwo kɛlanzɛbe nankaro mata-a fando-abe mbeji.

Hakki adɛ ayawuwa gade siyasaa letanyi au bigɛwa gade nya-a kasadɛ-a Lardɛwa Tawakkata Dunyabea kɛla kɛlzanyiro faidatinba.

Babu 15

Ndu yaye hakkinzɛ nɛmkam lardɛbenzɛ mbeji.

Nduma dalil baaro nɛmkam lardɛbenzɛ adɛga daptinba ye hakkinzɛ duwo nɛmkam lardɛbenzɛ faltɛbe yega daptinba.

Babu 16

Kamuwa-a kongawa-a wuraata angalla woso, kalangi abibema baaro jilibema, lardɛbema, au adin gadebema , hakkinza nyiya kɛndobe-a yal fandobe-aso mbeji. Sa nyiga kɛndobelan sandi indiso hakkinza kalkal kuru adɛgaima sa gadetɛbe ishiya ye.

Nyiyadɛ sai kasada sandi indi kamudɛ-a kwadɛ-abe mbejilan duwo tɛdin.

Kɛndɛga kamun kwanbedɛ shima badiyaram mɛradɛgata gaya ummabe wo kuru sandiga kɛndɛgaram-a kɛrye-ason sɛlifodɛ hakkinza.

Babu 17

Ndu yaye runzɛlaro razɛgɛ gantodɛ hakkinzɛ kuru adɛgaima shi-a am-a kɛltɛm gantodɛ ye.

Nduma dalil baaro razɛgɛnzɛga firtinba.

Babu 18

Ndu yaye hakkinzɛ nazaru kɛndobe-a tawakarbe-a adinbe-a mbeji, suro hakki adɛben nambe adinnzɛ au nzasaranzɛ faltɛbe-a nambe shi tilonzɛ au suro jamuwubelan fetero au ashirlan adinzɛ au nzasaranzɛ yikkɛlio-a kɛndo-a abuttɛ-a lajiptɛ-alan tartaabe mbeji.

Babu 19

Ndu yaye hakkinzɛ rayiwu-a bayan kɛndo-abe mbeji, suro hakki adɛben nambe rayiwunzɛ kalma baaro bayanjin kuru shilan nzɛra majin ye sɛmoyin ye kuru hawarazɛgin futu hawarbe jilibin yaye kɛlangai baaro.

Babu 20

Ndu yaye hakkinzɛ suro nɛlefaben samno sapta-a maamala kɛndo-abe mbeji.

Nduma dunon karapka kasatsɛnyiro nzɛkko ba.

Babu 21

Ndu yaye hakkinzɛ suro gumnati lardɛnzɛbero ci nzɛkobe mbeji, shi kɛlanzɛ au wokkilnzɛ futu kalkallan kartɛnamben.

Ndu yaye hakkinzɛ suro lardɛnzɛben jamaro tunotobe mbeji.

Kasada jamabedɛ shima fɛrtɛ kɛntɛwo gumnatibero walzɛ, kasada adɛ suro karno gondua ye jirebe ye lardɛ kɛpson ndu-a nduana-asoye sɛdin ye kuru kuriya suro ashirlan au ashirga samunzɛnalan tɛdinbelan bayantɛ.

Babu 22

Ndu yaye kɛla shi memba ummabedɛn, hakkinzɛ nzɛliwo-a asutɛ-abe mbeji, kasadɛ lardɛbemben au tawaa indikate lardɛwabemben futu fasal-a nyama-a lardɛdɛbe lɛgatarro, razɛgɛ-a nɛmkamnzɛ-a tɛgalisɛ baaro yita fuwutɛgɛ.

Babu 23

Ndu yaye hakkinzɛ cida kɛndobe mbeji, cida sɛragɛna karzɛ kɛndo-a futu kaida sandɛnalan kɛndo-a kurumason kaidu cida babelan shiga nzɛtakawo-a.

Ndu yaye, gayirtɛ futubibema baaro, hakkinzɛ cida sɛdɛna lɛgatarro shiga alutɛbe mbeji.

Ndu yaye cidama sɛdinga hakkinzɛ awo alutɛginmadɛ shi-a yalwanzɛ-a futu darajanza nɛmadamganabe lɛgatarro sandiga cittɛnnama alutɛgɛbe mbeji kuru nzɛra yaye nasha laa jamaro nafaka kɛnjobelan mbejiga diwijnba.

Ndu yaye hakkinzɛ karapka cidawube koktabe au kɛlanzɛ nzɛkkobe mbeji tamtam kɛlanzɛbe nzɛliwo nankaro.

Babu 24

Ndu yaye hakkinzɛ tusu-a kundushi kɛndo-abe mbeji, loktu cidabe angalbe kurzɛna-a batalla biyaa-a kunten.

Babu 25

Ndu yaye hakkinzɛ futu kalkalro mɛradɛtɛnaro kɛndɛgabe nɛlefa-a kɛndɛga kɛji shi kɛlanzɛ-a yalwanzɛ-abe mbeji, hatta kɛmbu-a kɛnza-a kazɛmu-a fato-a, kurun-a awowa gade tamtambe mɛradɛtɛnan kunten-a, kuru hakkinzɛ shiga nzɛtkawobe mbeji wanee cidaba laa, kundondi laa, nɛmmaskin laa, nɛmkamba laa, ngɛli kurwu laa au kɛndɛgaram kun-balinbe laaye shiro kɛntɛri cuwutoga.

Ya kɛndewu-a tada tiwal-aso ngɛlaro cistɛgɛ mɛradɛzana. Duli dukso, nyiyaa au nyiya baalan katambo yaye sɛliwo fandodɛ hakkinza.

Babu 26

Ndu yaye hakkinzɛ shiro ilmu kɛnjobe mbeji. Ilmu gultɛna adɛ de sulro tin, gananzɛ yaye ilmu badiyarambe-a fuwunzɛbe mɛradɛtɛna-a. Ilmu badiyarambe gultɛna adɛ kɛnjonzɛdɛ mburo walzɛna. Ilmu nzundube-a shanabe-adɛ ndarason mbeji ye tɛwandin yero tɛdɛ kuru adɛgaima ilmu sandin fuwunbedɛ ye ndusoye sɛwandɛ kɛrajinro walzɛ natɛgɛye suwudiya.

Ilmudɛ nɛmkam kamilga garta-a dunotɛ hakkiwa adamganabe-a nambenzɛ-a nganzazɛro walzɛ. Asutu-a kanadi-a nɛmkam-a indikate lardɛwabɛn fuwuzɛgin. Nɛmgade jilibɛ au adinbe baro sɛdin, kuru lardɛwa Tawakkata Dunyabɛye cidanzɛ nɛlefa rotabedɛga yitafuwuzɛgin.

Yaso Awasoyɛ hakkinza burwoza jili ilmubɛ mɛradɛzana karza dulinzaro gultɛgɛbe mbeji.

Babu 27

Ndu yaye hakkinzɛ kal baaro lamarwa adabɛ jamabelan gaam luwobɛ mbeji, adawadɛn tamtam fantɛ-a yasan ngalwotɛgɛnzɛro kɛla nzɛkko-a kuru faidanzɛn riwa fando-a.

Ndu yaye hakkinzɛ nzɛliwobɛ mbeji kɛla lamar bɛrzɛm-a kɛla ro-aben cida nasha kimiyaɛn kal, ruwobɛn kal au muskon tandobɛn kal shima kunkunzɛ sutuluiya.

Babu 28

Ndu yaye hakkinzə howum duwo hakkiwa-a nambe-a suro Wowur adəben dəganadəga yita bayanzəginma gantobe mbeji.

Babu 29

Ndu yaye cida jama suron dəgana sandi baslan nəmkamnzə kaima baaro yitafuwuzəgin adəbe kəndobe mbeji.

Suro hakkiwanzə-a nambenzə-a yitagatsəginben, ndu yaye kəlangai howumye gənazənaro dazəgin təganasmaro dalil hakkiwa-a nambe-a jama gade gapsanadəbe asutə darajatə-a mərədəwa lamarwa bərzəmbe-a kaida suro jamaben kəndəgabe-a suro naptəram demokəradiyaben nəlefa fando-a.

Hakkiwa-a nambe-a anyi futubiman dalil Lardəwa Tawakkata Duniyabeye ferzənadən nguron dalilwa gadero faidatinba.

Babu 30

Abima suro Wowur adəben fasaranzə lardəro, samnaro au kamro kartaaro tən̄yi, amari hakki abima kəndobe au nya laa nganzatəbe kəla hakkiwa-a nambe-a suro adəlan dəganadəben bannaro fasartən̄yi ye tən̄yi ye.